

## E Bär ufgebunn Goldeni Hochzeit mit Iwerraschunge

Ich han gewisst, dass es Helga un de Stefi vor 50 Jahr gheirat han, im August 1973 in Bogarosch. Doch es genaue Datum? Do han ich beim Gerda, em Helga seiner Schwester, mit dem ich acht Jahr lang die Schulbank gedrickt han, nohfrooe misse. Also die Trauung im Gemeindehaus war am 12. un die Hochzeit am 25. August. Mir zwaa han dann a berotschlacht, wann dass mer do am beschte gratuliere solle un sin iwerens kumm: Mir winsche de zwaa zur Goldenen Hochzeit am 25. August un des iwer Radio Temeswar mit Grusslieder.

Weil de Stefi awer aus Wojteg stammt un es Helga noh der Hochzeit dorthin als junges Weib gezoo is, war ich neugierich, wie die zwaa sich kennengelernt han. Un wieder han ich es Gerda ausgfroot un erfahr, dass ihre Familie in Wojteg entfernti Verwandti ghat hat, dass es Helga dorthin uf die Kerwei gfahr is. Un so is es kumm, wies kumme hat misse: gsiehn, verliebt, verlobt un verheirat. Doneilich, so zehn Täch vor dem 25. August, ruft mich de Mani, em Goldene Hochzeitspaar ihre Bu, an un bitt mich: " Mir wille unser Eltre zum 50. Hochzeitstach iwerrasche. Do brauche mer eier Unerstizung, weil mer se jo ausm Haus locke wille. Sie misse scheen angezoo sin. Mir feire se in eem Lokal ".

E Nacht han ich rum studiert un dann es Helga angeruft un gfaselt: "Du weescht doch, die Bogaroscher Kerch ist im August 1774 ingeweihet gin. Jetz hat sich die Heimatortsgemeinschaft vorgohol, ufs Jahr e Feierlichkeit zum 250. Weihetach der Kerch zu organisiere. Un do solle sich die Bogaroscher, die wu noch do im Banat lewe, mit eener Delegation aus Deitschland treffe, um derdriwert zu rede. De Stefi soll natierlich a mitkumme. Zieht eich scheen an, sicher gin a Bilder gemacht".

Dernoh han ich mich nimi getraut anzurufe, weil ich Ängschter ghat han, ich verpappl mich amend. Han awer immer es Gerda gfruit, ob sei Schwester nut drufkumm is, dass ich em e Bär ufgebunn han.

Dann wars soweit, mir han an sellem Tach alli im Lokal uf die zwaa Gfeierte gewart. Ihre Kinner han des alles so scheen organisiert un die Iwerraschung war groß, wie se mit „Hoch solle se lewe“ empfang gin sin.

Doch noher hat es Helga verrot, dass so manches unklar war, dass sich ihre Kinner a paarmal verred han. Doch es traat mer nix noh.

Hat ihr selmols des gewollt:  
50 Johre? - Ehe- Gold?  
Oder hat ihr gedenkt: Mal sehn,  
e paar Jahr werd' s sicher gehn?

Un jetz seid ihr heit  
seit 50 Johre Eheleit!  
Oh je, wer hätt des gedacht,  
was de Mensch aus Liebe macht!

Also winsche mir: macht weiter,  
bleibt vereent, vergnügt un heiter!  
Immer lächle! Immer strahle!  
Was zähle do schun Jahreszahle!